

Uunga siunnersuut: Siusinaartumik pensionisiat pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2019-imeersoq.

(Kalaallit Nunaanni, Danmarkimi Savalimmiunilu kommunit akornanni paasissutissanik paarlaasseqatigiittarneq, nuunnermi siusinaartumik pensionisianik qaammatini 12-ini attassiinnarnissaq, ingerlaannartumik qaffasinnerpaanik siusinaartumik pensionisianik pisartagaqalersitsineq)

Pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini makku ilaasortarai:

Inatsisartunut ilaasortaq Mala Høy Kúko, Siumut, siulittaasoq

Inatsisartunut ilaasortaq Stine Egede, Inuit Ataqtigiit, siulittaasup tullia

Inatsisartunut ilaasortaq Anna Wangenheim, Demokraatit

Inatsisartunut ilaasortaq Aqqa Samuelsen, Inuit Ataqtigiit

Inatsisartunut ilaasortaq Karl-Kristian Kruse, Siumut

Inatsisartunut ilaasortaq Malene Vahl Rasmussen, Demokraatit

Inatsisartunut ilaasortaq Mikivsuk Thomassen, Inuit Ataqtigiit

UKA2019 ulloq 30. september 2019-imi siullermeerinerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Siunnersuut suliniutinik pingasunik imaqarpoq, siusinaartumik pensionisiallit naalagaaffeqatigiit immikkoortuisa akornanni nuunnermini killilersuutaasut

aaqqinneqarnissaannik siunertaqartoq. Taamaalilluni siusinaartumik pensionisialik naalagaaffeqatigiit immikkoortuisa akornanni siusinaartumik pensionisialik pilersornissamut tunngavissaat qaammatit aqqaneq marluk angullugit qulakkeerseqartarnissaat siunnersuutigineqarpoq. Tamatuma saniatigut siusinaartumik pensionisiallip nunatsinniit Danmarkimut Savalimmiunulluunniit nuunnerani siusinaarluni pensionisialimmut attuumassuteqartut paasissutissallu pingaarutillit ilanngullugit nassiunneqartarnissaasa ajornarunnaarsinneqarnissaat siunnersuutigineqarpoq. Kiisalu Danmarkimiit nuuttut siusinaarluni pensionisiallit aamma Savalimmiuniit nuuttut qaffasissumik siusinaartumik pensionisiallit sulisinnaangitsut imaluunniit annikitsumik sulisinnaassusillit nunatsinnut nuukkaangata sioqqutsisumik sulisinnaanermut naliliivigineqaaqqaanngikkaluarlutik qaffasinnerpaamik siusinaartumik pensionisianik pisartagaqartalernissaat siunnersuutigineqarpoq.

2. Tusarniaanermi akissutigineqartut

Tusarniaanermi akissutigineqartut inatsisissatut siunnersuummut ilanngunneqarput, tamanna Inatsisartut Siulittaasoqarfiata ilusiliinissamut piumasaqaataanut naapertuuppoq.

3. Ataatsimiititaliap siunnersuummik suliarinninnera

Siusinaartumik pensionisiallit naalagaaffeqatigiit immikkoortuisa akornannut nuunnerminni pilersornissamut tunngaviit attatiinnarnissaannut periarfissat oqinnerulersinniarneqarnerat ataatsimiititaliamit pitsaasutut isumaqarfigineqarpoq. Tamanna isumannaannerulersitsinermik innuttaasullu ataasiakkaat eqaannerusumik nuttarsinnaanerannik kinguneqassaaq. Tamatuma saniatigut innuttaasoq Danmarkimeersoq imaluunniit innuttaasoq Savalimmiuneersoq qaffasinnerpaamik siusinaartumik pensionisianik pisartagalik sulisinnaanera naliliivigeeqqaanngikkaluarlugu qaffasinnerpaamik siusinaartumik pensionisiaqartilerneratigut allaffissornerup annikillisinneqarneranik siunnersuutigineqartup kingunerissagaa naatsorsuutigineqarpoq. Tamatuma saniatigut siusinaartumik pensionisiallit ataasiakkaanut Danmarkimut nuunnissaminnik toqqaasimasunut sullissinermut siunnersuutigineqartoq sivikillisaaqataassasoq ataatsimiititaliamit neriuutigineqarpoq.

Nalinginnaasumik oqaaseqaatini ima allasimasoqartoq ataatsimiititaliamit maluginiarneqarpoq:

Ukiumi siunnersuutip atuutilerneranit ilanngaatitaqanngitsumik aamma ukiumut missingersuutini siunnersuutip nassatarisaanit siusinaartumik pensionisianut ukiumut aningaasartuutit katillugit 1,1 mio. kr.-nik annertussuseqassapput.

(Imm. 3, Nalinginnaasumik oqaaseqaatit)

Nalinginnaasumik oqaaseqaatit misissoqqinneqarnerat tunngavigalugu oqaasertaliorneqarnera kukkuneqarsimassasoq ataatsimiititaliap ilimagaa, taamaalilluni oqaaseq ilanngaatitaqanngitsumik aningaasartuutit issuaanermi qulaaniittumi allassimasariaqanngikkaluarluni.

Taamatut paasinninnermut Naalakkersuisut isumaqataanngikkunik siunnersuutip aappassaaneerreqarnerani tamanna oqaaseqarfigeqqullugu qinnuigineqarput.

Siunnersuutip misissorneqarnerani annertunerusumik oqaaseqarfiginissaanut ataatsimiititaliaq pissutissaqanngilaq, taamaattumillu siunnersuummut nalinginnaasumik immikkullu oqaaseqaatigineqartunut innersuussissalluni.

4. Siunnersuutip aningaasatigut kingunerisassai

Siunnersuutip piviusunngortinneqarneratigut aningaasatigut kingunerisassai siunnersuummut oqaaseqaatini nalinginnaasuni allaaserineqarput. Siusinaartumik soraarnerussutisialinnut 1,1 mio. kr.-inik ilanngaateqanngitsumik ukiumut ataatsimut aningaasartuutaanerunissaat siunnersuummi allassimavoq.

5. Ataatsimiititaliap inassuteqaataa

Ataatsimiititaliap **isumaqatigiittup** siunnersuut **akuerineqassasoq** inassutigaa.

Taama oqaaseqarluni isumaliutissiisummilu oqaatigineqartunik paasinnilluni ataatsimiititaliap siunnersuut aappassaaniigassanngortippaa.

Mala Høy Kúko

Siulittaasoq

Siumut

Stine Egede

Siulittaasup tullia

Inuit Ataqatigiit

Anna Wangenheim

Demokraatit

Aqqa Samuelsen

Inuit Ataqatigiit

Karl- Kristian Kruse

Siumut

Malene Vahl Rasmussen

Demokraatit

Mikivuk Thomassen

Inuit Ataqatigiit